

671.1237
078
17

東光縣志

東光縣志卷八

光緒十二年重修

人物志上

漢書古今人物表自帝王至士庶雖分九等大約以德行品誼相高不以貴賤論也然後之人猶有嘆焉謂其述古而遺今又所第或未盡愜耳不知其今人皆臚於列傳事蹟具垂褒貶自寓亦何爲未畢書哉今師列傳之遺故以仕績稱首而忠節又別錄之以孝友爲先而義行亦別錄之至於文學足爲邦國之光隱逸足徵高尚之志技藝亦彰片善之長皆區別而敘錄之語曰十室之邑必有忠信惟能忠信故雖

貧賤終身亦必取爲法若不忠信卽高官厚爵亦必削而除後人宜知所擇矣志人物

仕績

宋

劉甲字師文永靜軍東光人元祐宰相摯之後也父著

爲成都漕幕葬龍游因家焉

進士題名東光人

甲淳熙二年

進士累官至度支郎中遷樞秘院檢討兼國史院編修官實錄院檢討官使金至燕山伴宴完顏者名犯仁廟嫌諱甲力辭完顏更名修九月三日金宴甲以宣仁聖烈后忌辭還除司農少卿進太常擢權工部

侍郎陞同修撰除寶謨閣待制知江陵府湖北安撫使移知瀘州程松爲四川宣撫使吳曦副之以甲知興元府利東安撫使時蜀口出師敗劬金陷西和成州曦焚河地縣先是曦已遣姚淮源獻四州於金金鑄印立曦爲蜀王甲時在漢嘉未至鎮也金人破大散關興元都統制毋思以重兵守關而曦陰徹募關之戍金自板岔谷繞出關後思孤軍不能支遂陷松謀遁甲固留不可據以便宜檄甲兼沿邊制置曦遣王鉞趙觀以書致甲甲援大義拒之因臥病曦又遣其弟旼邀甲相見甲叱而去之乃援顏真卿河北故

事欲自拔歸朝先募二兵持帛書遺參知政事李壁告變曦僭王位甲遂去官朝廷久乃微聞曦反狀韓侂冑猶不之信甲奏至舉朝震駭壁袖帛書進上覽之稱忠臣者再以帛書賜甲曰所乞致仕實難允從召赴行在二兵皆補官甲舟行至重慶聞安丙等誅曦復還漢中上奏待罪詔趣還任甲奏叛臣子孫族屬及附僞罪狀公論快之會安丙以楊巨源自負倡義之功陰欲除之巨源旣死軍情叵測除甲宣撫使未幾金台鵲嶺關進屯八里山甲分兵進守諸關截潼川戍兵駐饒風嶺以待之金人知有備引去侂冑

誅上念甲精忠拜寶謨閣學士賜衣帶鞍馬朝廷聞
彭輅與丙不協以書問甲又俾論丙汰諸軍勿過甚
明年罷宣撫司合利東西爲一帥治興元移甲知潼
川府安丙旣同知樞密院事董居誼爲制置使甲進
寶謨閣學士知興元府利路安撫使節制本路屯駐
軍馬朝廷計居誼猶在道命甲權四川制置司事先
是大臣撫蜀者諸將事之有所謂互送禮實賄賂也
甲下令首罷之凡丙所立茶鹽柴邸悉廢之丙增多
田稅甲命屬吏討論由一府言之歲減凡百六十萬
緡米麥萬七千石邊民感泣嘉定七年卒於官年七

十三甲幼孤多難母病刲股以進生平嘗謂吾無他
長惟足履實地晝所爲夜必書之名曰自監爲文平

澹有奏議十卷理宗詔諡清惠

宋史

除潼川安撫劉甲誥當一面以纘戎式倚金湯之
固遴羣工而選牧孰踰簪橐之英肆隆易鎮之恩
庸懋幹方之績朝議大夫煥章閣待制潼川府路
兵馬都鈐轄兼本路安撫使知瀘州軍州事兼管
內勸農使賜紫金魚袋劉甲望高時輩志在本朝
智略政術每推誠於獻納文武爲憲俄自跋于翰
藩粵從制御之行益見壯猷之展荆州植纛端有
去思瀘水書符已歌來暮朕輯甯王度鞏固邊陲
厥今閩寄之雄無若漢中之地惟天設險瞻劍閣
以猶存衆志成城得實臣而可恃特委帥權之重
仍聯禁路之華顧眷倚之方深實修攘之允賴因
利乘便勢雖易於建瓴和衆安民備莫先於徹土
務寬憂顧

嗣對寵褒

劉震孫庠生以父甲廕中書平江府主事除福建常平

倉使者有惠政

續志稿

除福建常平劉震孫制劉震孫以元祐名臣之裔文學政事見稱當時入則嘗爲言語文字之官出則屢膺禮樂光華之遣使輶所至民氣爲蘇是蓋識大體者閩更歉歲而值有秋常平使者繫斯民司命是用起家而予節焉其尙時敘散公激揚以稱予選使之意

元

徹里鐵木兒字士芳欽察氏東光人至正十九年任山

西稷山縣知縣魯花赤與縣尹葛克敬善相與均賦役

立庠序興利革弊政化以新邑人戴之立碑以頌德

政稷山縣志

稷山郝希文撰德政碑記方今天下失甯盜賊竊發占據城池蹂踐生靈何可勝紀於斯時也擁強兵專方面者每以軍食軍需爲重名項之多奚啻百端任守令者不一二見設以魏焦之人出以撫字教育自任者不一二見設以魏焦之人出以捫瘵之餘民應無己之追求亦將如之何哉又兄有資質賢愚之不齊古今人物之不逮此其所以得人之難而於斯時之尤難也稷之爲邑土厚泉甘乃陶唐之境內后稷之故墟俗尙散樸儉而不嗇紡績織紉耕田鑿井上以供公家軍儲之費下以給父母妻孥之養昔人所謂有堯舜之遺風而號稱易治豈虛語哉我監邑名徹里鐵木兒字士芳欽察氏景州東光人也下車於己亥之冬大尹葛君名禪字克敬霸州文安人也蒞政於庚子之春二侯肝膽相照親若兄弟乃相謂曰比見同僚不和以病民者多也况今天下多事之秋縱不能施善政以養吾民奈何蹈其轍以困吾民乎於是相與立法度振紀綱均賦役量民力之有無視土田之肥瘠分鄉社爲九等賦役既均事至物來隨其大小高下應之而無難焉先敦請師儒每社立學一

所選民間俊秀子弟以充生徒乃爲民正疆界勸
耕耘通溝洫教樹蓄使民知職分之所當爲務農
於春夏之間講學於秋冬之際桑麻蔽野學校雲
興衣食有餘而人材彬彬矣此皆二侯政化之所
施非徒然也去歲之大旱自春徂夏雨雪絕少葛
侯乃捐俸金購香果齋戒沐浴露頂跣足徧禱羣
祠旦暮不怠者數日而雨大作沾濡滂沛易凶年
爲樂歲侯之德非徒能化乎民其精誠亦且通於
神明矣嗟夫苟令長不得其人專以蠶食爲務老
者不得安其居少者不得盡其養弛農隙之教肆
凶惡蠹賢良使民之脂膏日侵月削彼方偃然自
以爲得志其於國家付託之本意爲何如也其視
葛侯愛民如子而民仰之如父母者不啻陰陽晝
夜之相反矣蓋惟本於誠正修齊之功根於心而
發於人故其爲政也寬猛得宜剛柔相濟纖毫悉
舉是誠可爲循良吏故不可不紀詩曰姑射蒼蒼
汾水湯湯中有哲人爲民之章不寬不猛侯伯之
防春花秋菊雨露時芳如松之茂如竹之剛愛利
斯民教勸有方禾麻蔽野二
麥雲黃豐碑永建厥德靡亡

明

張謙祖冲素長沙府通判父從恕鎮西甯總管洪武初

謙以茂才舉授陝西兩當典史卓有政聲

舊志

馬孔惠字孝卿宜章縣令經之子成化八年進士授兵科給事中剛方自持彈劾不避權要凡所陳奏多裨

時政尋以論中官忤旨左遷福建參議

雍正通志

廖紀字時陳

一作廷陳

東光人宏治三年進士授考功主事

屢遷文選郎中正德中歷工部右侍郎提督易州山廠羨金無所私遷吏部左右侍郎世宗立拜南京吏部尚書調兵部參贊機務被論解職嘉靖三年大禮

議既定吏部尙書楊旦赴召道劾張璫桂萼璫之
黨陳洸遂劾旦而薦紀帝罷旦以紀代之紀疏辭言
臣年已七十精力不如喬宇聰明不如楊旦時宇旦
方爲帝所惡不許光祿署丞何淵請建世室祀興獻
帝下廷議紀等執不可帝弗從紀力爭曰淵所言干
君臣之分亂昭穆之倫蔑祖宗之制臣謹昧死請罷
勿議不納會廷臣多諍者議竟寢已條奏三事其末
言人材當惜謂正德之季宗社幾危議者但知平定
逆藩之功而不知保護京師之力自陛下繼統老成
接踵去新進連茹登以出位喜事爲賢以凌分犯禮

爲貴伏望陛下於昔年致仕大臣念其保護之勳量
行召用其他降職除名遣戍者使得以才自効帝但
納其正士風重守令二事而已三邊總督楊一清召
還內閣璫等欲起王瓊紀推彭澤王守仁帝不允復
以鄧廷璋王憲名上竟用憲五年正月御史張袞喻
茂堅朱實昌以世廟禮成請宥議禮得罪諸臣璫等
亦以爲請章俱下吏部紀等列上四十七人卒報罷
御史魏有本以劾郭勛救馬永謫官給事中沈漢等
論救帝不聽紀從容爲言且薦永及楊銳帝納之有
本得無謫紀在南都持議與璫合坐是劾罷璫輩欲

引助已遂首六卿而紀顧數與牴牾聒輩亦不喜年
老稱病乞歸許之去初獻皇實錄成加太子太保至
是進少保賜敕乘傳夫廩祀故事有加卒贈太保諡
僖靖祀鄉賢著有四書管窺童訓等書

明史兼
通志

馬汝松字節甫號禹山世業農桑父堯輔薄宦有冰蘖
聲汝松負性簡重博洽多聞嘉靖十九年經魁二十
三年成進士起家中書舍人秩滿奏績擢工科給事
中正色立朝丰采凜然歷數載晉都本科與楊椒山
公同鄉薦夙稱莫逆議論多符爲名諫臣越七年竟
以直言忤權罷歸終不復仕日娛詩文課諸子學無

一語撓守牧權亦無尺一走長安道中輿論高之所
居故白扉至不容車河間士大夫號爲清門先生卒
年五十有二祀鄉賢著有疏論遺編清門先生詩鈔
舊志

邑令蕭德宣題馬禹山遺像詩一疏寒奸膽椒山
又禹山同年完大節異代見奇顏報國心終赤歸
田鬢始斑至今觸
邪意隱約兩眉間

莊蒞民字善甫號禮齋年十七補博士弟子第一旋奉
父命赴都從翰林席虛山學卓有譽望嘉靖十年以
麟經魁畿內二十六年舉進士筮仕山陽縣大計治
化居天下第二號時有當道子過山邑索夫役竟弗

應及行取將處以科道當道者語執事曰莊山陽乃
至此耶銓部阿其意授刑曹焉恤刑絳都議賑淮上
衡財折獄各有成績遂以刑曹出守陝西西安府是
年陞本省按察司分巡河西道副使駐鄜州經畫陝
以西之北邊關輔土大夫學官弟子暨正學書院諸
弟子咸贈以言有山斗瞻依甘棠遺愛棠蔭頌聲諸
圖詩以誌不忘嗣調雲南參政德教治化無異於陝
遷山西行太僕寺卿致仕年九十卒祀鄉賢著有宣

達錄

舊志

邑人王嘉言祭莊太僕文鳴平公生穎異抱奇蘊
珍天性嗜學巍然不羣援筆摘藻咄咄驚人掉鞅

人物志上仕績

棘園踔厲北省遂魁春秋榮我鄉井公車數困芙蓉秋冷池中蛟龍忽得雲雨喬舄旣搏宓琴卽鼓愷悌宜人允稱父母入司爽鳩出賑淮浦所活萬人頌聲斯普剖符西安出守專城寬和不擾藉甚黃丞華岳增高渭水同清晉秩臬副恩威愈宏載乏罔卿蔚有聲稱公也倦遊懸車在里芬華靡耽寓興文史奕奕嗣人克濟其美或登賢科或遊泮水質有其文彬彬君子嗟我敝邑於何儀型高山仰止實藉老成心也日暎行也蘭馨六十杖鄉八十耄昏公也九十不杖不昏朝言嘻嘻夕言怡怡三日不見溘然長歸雖云壽考吾黨何依日余小子方幸得師今也何賴尤懷之悲

王嘉言字孔彰號慎齋生而穎慧年十六補博士弟子

嘉靖三十七年舉於鄉四十四年捷南宮選庶常隆

慶元年改授浙江道監察御史入西臺以風紀言責

爲已任會華亭與新鄭忤因上言傷直遂與新鄭有